

Comunicado di Prensa

28 di november 2023

Mas intercambio di estudiante den Reino pa medio di Koninkrijksbeurs

Entrante otro aña di estudio, mas of menos 120 estudiante pa aña por bay pa intercambio of stage den Reino pa medio di e asina yama Koninkrijksbeurs. Esaki ta un programa nobo di movilidad pa tur estudiante den Reino, cu ta enfoca riba aumenta e intercambio di estudiante pa termino cortico. Recientemente, e prome cinco studentenan Caribense a cuminsa na Hulanda cu un Koninkrijksbeurs. Pa e aña di estudio aki, ta spera cu mas of menos 25 estudiante lo haci uzo di esaki. Koninkrijksbeurs ta un di e medidanan pa yuda estudiante Caribense den nan carera di estudio.

Ta importante pa traha riba mehoracion di exito di estudio di estudiante Caribense. For di un [investigacion](#) reciente ta resulta cu e cambio di rumbo di estudio den wo y hbo ta (hopi) mas halto cerca estudiante cu pre-estudio den parti e Caribense di Reino cu estudiante cu a sigui nan pre-estudio na Hulanda Europeo. Den e nivel universitario (wo), e porcentahe di estudiante cu ta cay afo for di e estudio den e prome aña ta mas halto entre estudiante di e parti Caribense. Hopi estudiante Caribense ta topa cu extra dificultad durante nan estudio, por ehempel na Hulanda. Un di e motibonan ta e gran transicion pa studia na Hulanda, cu ta resulta den un cantidad relativo halto di estudiante cu ta cay for di nan estudio. Ademá, estudiante Caribense tin cu lidia cu hopi problema practico, manera vivienda y haya un BSN (Number di Seguro Social).

Preveni 'drop-out' y desapunto

Koninkrijksbeurs ta un programa nobo di movilidad pa tur estudiante den Reino: mbo, hbo y wo. E programa tin como meta aumenta intercambio di duracion cortico di estudiante entre e paisnan den Reino. Dus, por ehempel, un estudiante di Hulanda cu ta bay University of Curaçao Dr. Moises Da Costa Gomez (UoC), of un estudiante di Aruba cu ta bay Hulanda pa haci su practica. Ta un enriquecimiento di nan carera di estudio y ta duna oportunidad, specialmente pa e estudiante Caribense, pa purba prome cu sosten financiero si studia na Hulanda ta pas cu nan prome cu scohe pa un estudio completo. Estudiante por sigui materianan pa un periodo maximo seis luna na un instituto na Hulanda. E meta ta pa evita fayó di estudio y desapunto si nan lo scohe directamente pa un estudio completo. Asina, ta contribui na exito di estudio y igualdad di oportunidad pa estudiante Caribense. Menos 'drop-out' for di estudio tambe ta reduci e problema di debe cu hopi estudiante ta confronta cu ne. Esaki ta pone limitacion na nan regreso na nan isla di origen y ta causa brain drain. Koninkrijksbeurs ta haci studiamento na propio isla mas atractivo y ala vez ta duna oportunidad pa bay afo pa un temporada cortico pa intercambio.

Minister Dijkgraaf: "Tabata hopi inspirativo pa recientemente sera conoci cu e prome studentenan cu un Koninkrijksbeurs. Introduccion di e beurs aki ta un paso importante y concreto pa duna mas perspectiva, exito di estudio y igualdad di oportunidad na studentenan Caribense. Cu e programa di intercambio aki nos ta uza e forsa di e cuater paisnan den Reino."

'Erasmus+' den Reino

Koninkrijksbeurs ta comparabel cu e programa Erasmus+ cu ta duna estudiante e oportunidad pa sigui un semestre na un instituto Europeo cu sosten financiero. Cu Erasmus+, bo por bay como estudiante for di Aruba, Curaçao, Sint Maarten, Hulanda of e islanan cu ta forma Hulanda Caribense: Bonaire, Saba, Sint Eustatius cu un beurs pa tur pais Europeo pa intercambio of practica, pero esey no por sosode den Reino. E sumanan di beurs ta comparabel cu Erasmus+, den e reglamento di subsidio (cu ta actualmente den consulta riba internet) ta menciona cu estudiante Caribense por haya un beurs di maximal 5900 euro.

Den e aña academico aki, ta spera cu un total di mas o menos 25 estudiante piloto lo haci uzo di e beurs nobo. E meta ta pa, for di aña academico 2024-2025, mas of menos 120 estudiante por beneficia di e Koninkrijksbeurs pa aña. Hulanda ta destina un total di 0,6 mion euro pa e programa nobo di movilidad. Estudiante tin te 1^e di mei 2024 pa haci nan aplicacion pa un beurs pa september 2024.

Aumenta exito di estudio

Koninkrijksbeurs ta un di e medidanan pa amplia exito di estudio y oportunidad igual pa studiantenan Caribense. E topico aki tabata halto riba agenda di Conferencia Ministerial di Enseñansa di Cuater Pais siman pasa na Den Haag, e biaha aki bou di presidencia di Hulanda. E ministernan a acorda pa forma un team di programa cu lo percura pa mehoramento structural di exito di estudio den e proximo tres añanan.

Pa engrandece e posibilidad di exito di estudiante den enseñansa avansa, e cuater paisnan a inicia Caribbean Academic Foundation Year. Esaki ta un aña pre-academico conhunto pa prepara estudiante mihor pa nan estudio na hbo y universidad. Esaki mester haci e transicion for di enseñansa secundario pa enseñansa avansa mas facil, tanto academicamente como personalmente. Tambe ta tira bista riba e oferta di enseñansa riba e islanan. E prome paso ta un analisis di e mercado laboral pa identifica e deficiencianan den mercado laboral pa region Caribense.'